

# ZAKON O POSEBNOM REGISTRU LICA PRAVOMOĆNO OSUĐENIH ZA KRIVIČNA DJELA PROTIV SPOLNE SLOBODE I MORALA PREMA DJECI I MALOLJETNICIMA U FEDERACIJI BOSNE I HERCEGOVINE

Službene novine Federacije BiH, broj 13/2024

## I. OPĆE ODREDBE

### Član 1. (Opće odredbe)

(1) Ovim zakonom uspostavlja se poseban Registar lica pravomoćno osuđenih za krivična djela protiv spolne slobode i morala prema djeci i maloljetnicima u Federaciji Bosne i Hercegovine (u daljnjem tekstu: Registar), uređuje područje primjene, sadržaj i vođenje Registra, dostavljanje podataka iz Registra i posebne mjere koje se provode prema licima pravomoćno osuđenim za ta krivična djela.

(2) Svrha donošenja zakona je osiguranje zaštite djece i maloljetnika od krivičnih djela protiv spolne slobode i morala, te sprečavanje lica pravomoćno osuđenih za ta krivična djela da ponovno izvrše isto ili slično krivično djelo.

## II. PODRUČJE PRIMJENE, SADRŽAJ I VOĐENJE REGISTRA

### Član 2. (Krivična djela)

U Registar se upisuju lica pravomoćno osuđena za krivična djela iz Glave XIX (Krivična djela protiv spolne slobode i morala) Krivičnog zakona Federacije Bosne i Hercegovine ("Službene novine Federacije BiH", br. 36/03, 37/03, 21/04 - Ispr., 69/04, 18/05, 42/10, 42/11, 59/14, 76/14, 46/16, 75/17 i 31/23) kada su učinjena prema djeci i maloljetnicima, a to su:

- silovanje (član 203.),
- spolni odnošaj sa nemoćnom osobom (član 204.),
- spolni odnošaj zloupotrebom položaja (član 205.),
- prinuda na spolni odnošaj (član 206.),
- spolni odnošaj sa djetetom (član 207.),
- bludne radnje (član 208.),
- zadovoljenje pohote pred djetetom ili maloljetnikom (član 209.),
- navođenje na prostituciju (član 210.),
- trgovina ljudima (član 210a.),
- organizirana trgovina ljudima (član 210b.),
- iskorištavanje djeteta ili maloljetnika radi pornografije (član 211.),
- upoznavanje djeteta sa pornografijom (član 212.),
- rodoskrvnuće (član 213.).

### Član 3. (Podaci u Registru)

(1) U Registar se upisuju podaci o osuđenom licu i to:

- 1) ime i prezime, prethodno ime i prezime (ako ga je bilo), a za udate i djevojačko prezime, nadimak i lažno ime (ako ga ima), spol, datum rođenja, ime i prezime roditelja i djevojačko prezime majke;
  - 2) mjesto, grad, odnosno općina i država rođenja;
  - 3) jedinstveni matični broj;
  - 4) državljanstvo;
  - 5) prebivalište, odnosno boravište sa adresom stanovanja u vrijeme izvršenja presude;
  - 6) naziv suda i grada, odnosno općine na čijoj se teritoriji sud nalazi, a za strani sud - naziv države, broj i datum odluke prvostepenog suda koja je postala pravomoćna, odnosno odluke višeg suda ako je tom odlukom preinačena odluka prvostepenog suda;
  - 7) zakonski naziv krivičnog djela sa navođenjem člana, stava i tačke zakona koji je primijenjen,
  - 8) navođenje vrste kazne i sigurnosne mjere u kojem trajanju je izrečena,
  - 9) podaci o pravnim posljedicama osude,
  - 10) podaci o zaposlenju,
  - 11) podaci značajni za fizičko prepoznavanje osuđenog i njegovu fotografiju u vrijeme stupanja na izdržavanje kazne zatvora i u vrijeme izlaska iz kazneno-popravne ustanove, kao i pri svakom javljanju nadležnoj organizacijskoj jedinici kantonalnog ministarstva unutrašnjih poslova iz člana 10. ovog zakona;
  - 12) DNK profil osuđenog;
  - 13) datum stupanja na izdržavanje kazne zatvora;
  - 14) datum otpuštanja sa izdržavanja kazne zatvora,
  - 15) podaci o provođenju posebnih mjera propisanih ovim zakonom.
- (2) Podaci iz stava (1) ovog člana predstavljaju tajni podatak i mogu se koristiti samo u službene svrhe.

#### **Član 4. (Vođenje Registra)**

- (1) Nadležna kantonalna ministarstva unutrašnjih poslova vode poseban kantonalni registar, a federalni registar (u daljnjem tekstu: Registar) vodi nadležna organizaciona jedinica Federalnog ministarstva unutrašnjih poslova prema pravilima koja važe za vođenje krivične evidencije.
- (2) Podatke iz stava (1) ovog člana nadležni sudovi odmah po pravomoćnosti sudske odluke dostavljaju nadležnom kantonalnom ministarstvu unutrašnjih poslova radi upisa u kantonalni registar.
- (3) Nadležna kantonalna ministarstva dužna su dostaviti podatke iz člana 3. stav (2) ovog zakona Federalnom ministarstvu unutrašnjih poslova radi upisa u Registar u roku osam dana od dana dobivanja podataka od sudova.
- (4) U slučaju kada je riječ o već pravomoćno okončanim sudskim predmetima za krivična djela iz člana 2. ovog zakona, nadležno kantonalno ministarstvo unutrašnjih poslova podatke iz člana 3. ovog zakona unijet će u kantonalni registar u roku 60 dana od dana stupanja na snagu ovog zakona i dostaviti ih, bez odgađanja, Federalnom ministarstvu unutrašnjih poslova radi upisa u Registar.
- (5) Podatke o datumu stupanja na izdržavanje kazne, kao i datumu otpuštanja sa izdržavanja kazne kazneno-popravna ustanova u kojoj osuđeni izdržava kaznu zatvora dužna je dostaviti nadležnom kantonalnom ministarstvu unutrašnjih poslova i Federalnom ministarstvu unutrašnjih poslova.
- (6) Federalno ministarstvo unutrašnjih poslova dužno je zatražiti razmjenu podataka iz Registra sa nadležnim registrima Republike Srpske i Brčko distrikta Bosne i Hercegovine.
- (7) U Registar se upisuju i lica koja su pravomoćno osuđena za krivična djela protiv spolnog integriteta izvršena na štetu djece i maloljetnih lica, čija se krivična evidencija ne vodi na području Federacije Bosne i Hercegovine, a koja u Federaciji Bosne i Hercegovine imaju prijavljeno prebivalište, odnosno boravište.

- (8) Podaci iz Registra vode se trajno i ne brišu se.  
(9) Način vođenja registra propisat će federalni ministar pravde posebnim pravilnikom o načinu vođenja Registra.

### **III. DOSTAVLJANJE PODATAKA IZ REGISTRA**

#### **Član 5.**

#### **(Dostavljanje podataka sudu, tužiteljstvu i organima unutrašnjih poslova)**

Podaci iz Registra mogu se dati sudu, tužiteljstvu i organima unutrašnjih poslova u vezi sa krivičnim postupkom koji se vodi protiv lica upisanog u Registar, odnosno tužiteljstvu i organima unutrašnjih poslova u vezi sa otkrivanjem počinitelja krivičnih djela iz člana 2. ovog zakona, organima nadležnim za izvršenje krivičnih sankcija i nadležnim organima koji sudjeluju u postupku davanja uvjetnog otpusta, amnestije ili pomilovanja.

#### **Član 6.**

#### **(Dostavljanje podataka drugim organima)**

- (1) Podaci iz Registra mogu se dati i organima i organizacijama, ustanovama, institucijama i udruženjima koja u obavljanju poslova iz svoje nadležnosti ostvaruju neposredan kontakt sa djecom ako za to postoji opravdan interes, kao i drugim organima, organizacijama i ustanovama koje su nadležne za vođenje postupaka za ostvarivanje zaštite prava i interesa djece.  
(2) Organi iz stava (1) ovog člana obavezni su prilikom prijema u radni odnos ili angažiranja određenog lica za obavljanje poslova koji dovode do neposrednog kontakta sa djecom, zatražiti od nadležnog organa za vođenje Registra podatak da li je to lice upisano u Registar.  
(3) Ako lice za koje se traže podaci nije upisano u krivičnoj evidenciji koja se vodi u Federaciji Bosne i Hercegovine, organ nadležan za vođenje Registra obavezno će zatražiti podatke o osuđivanosti za krivična djela iz člana 2. ovog zakona od nadležnog organa u Bosni i Hercegovini koji tu evidenciju vodi.

#### **Član 7.**

#### **(Dostavljanje podataka inozemnim državnim organima)**

Podaci iz Registra mogu se dati i inozemnim državnim organima u skladu sa pravilima međunarodne pravne pomoći.

#### **Član 8.**

#### **(Obaveza izdavanja uvjerenja i njihova upotreba)**

Dostavljanje podataka iz Registra vrši se izdavanjem uvjerenja o podacima iz Registra i smiju se upotrijebiti samo u svrhu za koju se daju.

### **IV. POSEBNE MJERE**

**Član 9.**  
**(Primjena posebnih mjera)**

Prilikom izricanja sankcije, sud može odlučiti da se nakon izdržane kazne zatvora mogu primijeniti sljedeće posebne mjere:

- 1) obavezno javljanje organu nadležnom za unutrašnje poslove,
- 2) obavezno obavještanje o putovanju izvan mjesta stanovanja i promjeni ličnih podataka,
- 3) obavezno uzdržavanje od posjećivanja mjesta i objekata na kojima se okupljaju djeca.

**Član 10.**  
**(Obavezno javljanje nadležnom organu za unutrašnje poslove)**

- (1) Lice koje je pravomoćno osuđeno za krivično djelo iz člana 2. ovog zakona dužno je u roku 15 dana od dana izdržane kazne javiti nadležnoj organizacijskoj jedinici kantonalnog ministarstva unutrašnjih poslova prema mjestu stanovanja radi inicijalne evidencije, te se tom organu lično javljati u vremenskim intervalima koje odredi nadležni sud.
- (2) Nadležna organizacijska jedinica kantonalnog ministarstva unutrašnjih poslova obavezna je fotografirati lice koje ima obavezu javljanja propisanu u stavu (1) ovog člana prilikom svakog javljanja.

**Član 11.**  
**(Obavezno obavještanje o putovanju izvan mjesta stanovanja i promjeni ličnih podataka)**

Lice koje je pravomoćno osuđeno za krivično djelo iz člana 2. ovog zakona obavezno je obavijestiti nadležnu organizacijsku jedinicu kantonalnog ministarstva unutrašnjih poslova prema mjestu stanovanja o svakom putovanju izvan mjesta stanovanja, odredištu i dužini trajanja putovanja najkasnije 24 sata prije putovanja, te u roku tri dana prijaviti svaku promjenu ličnih podataka o čemu se obavještava organizacijska jedinica kantonalnog ministarstva unutrašnjih poslova nadležna za vođenje Registra.

**Član 12.**  
**(Obavezno uzdržavanje od posjećivanja mjesta i objekata na kojima se okupljaju djeca)**

U cilju zaštite sigurnosti djece od seksualne zloupotrebe, zlostavljanja i iskorištavanja, počiniteljima krivičnih djela iz člana 2. ovog zakona utvrđuje se obaveza da se uzdržavaju od posjećivanja mjesta i objekata na kojima se okupljaju djeca kao što su školske zgrade, školska dvorišta, vrtići, igrališta, igraonice, dječje manifestacije i slično.

**Član 13.**  
**(Upoznavanje sa posebnim mjerama i njihovo trajanje)**

(1) Kazneno-popravna ustanova prilikom otpuštanja lica sa izdržavanja kazne izrečene za krivično djelo iz člana 2. ovog zakona obavezna je upoznati to lice sa obavezama iz čl. 10., 11. i 12. ovog zakona.

(2) Ako se upis lica u Registar vrši na osnovu podataka iz krivične evidencije, lica ovlaštena za vođenje Registra će u roku mjesec dana nakon upisa u Registar obavijestiti upisano lice o obavezama iz čl. 10., 11. i 12. ovog zakona.

(3) Nadležni sud može odrediti da obaveze iz čl. 10., 11. i 12. ovog zakona mogu trajati od pet do 10 godina od dana izdržane kazne ako lice u tom periodu ne izvrši neko od krivičnih djela iz člana 2. ovog zakona.

## **V. ZAVRŠNE I PREKRŠAJNE ODREDBE**

### **Član 14. (Prekršajne odredbe)**

(1) Novčanom kaznom od 10.000,00 KM do 20.000,00 KM bit će kažnjeno pravno lice navedeno u članu 4. ovog zakona ako u propisanom roku ne dostavi podatke organu nadležnom za vođenje Registra.

(2) Novčanom kaznom od 8.000,00 KM do 15.000,00 KM bit će kažnjeno odgovorno lice u pravnom licu, ako od nadležnog organa ne zatraži podatke u skladu sa članom 6. ovog zakona.

(3) Novčanom kaznom od 1.000,00 KM do 5.000,00 KM bit će kažnjeno za prekršaj lice upisano u Registar koje ne izvrši neku od posebnih obaveza navedenih u čl. 10., 11. i 12. ovog zakona.

(4) Novčanom kaznom od 500,00 KM do 2.000,00 KM bit će kažnjeno za prekršaj lice koje zloupotrijebi podatke iz Registra radi zastrašivanja ili uznemiravanja lica upisanih u Registar ili članova njihove porodice ili te podatke javno objavi.

### **Član 15. (Donošenje podzakonskog propisa)**

Federalni ministar pravde donijet će propis iz člana 4. stav (9) ovog zakona u roku 90 dana od dana stupanja na snagu ovog zakona.

### **Član 16. (Obaveze usklađivanja odredbi Krivičnog zakona Federacije Bosne i Hercegovine)**

(1) U slučaju kolizije ovog zakona sa odredbama Krivičnog zakona Federacije Bosne i Hercegovine ("Službene novine Federacije BiH", br. 36/03, 37/03, 21/04 - Ispr., 69/04, 18/05, 42/10, 42/11, 59/14, 76/14, 46/16, 75/17 i 31/23) primjenjuju se odredbe ovog zakona.

(2) Odredbe Krivičnog zakona Federacije Bosne i Hercegovine o brisanju osude uskladit će se sa odredbama ovog zakona u roku šest mjeseci od dana stupanja na snagu ovog zakona.

### **Član 17. (Stupanje na snagu)**

Ovaj zakon stupa na snagu osmog dana od dana objavljivanja u "Službenim novinama Federacije BiH".

Predsjedavajući  
Doma naroda  
Parlamenta Federacije BiH  
**Tomislav Martinović**, s. r.

Predsjedavajuća  
Predstavničkog doma  
Parlamenta Federacije BiH  
**Mirjana Marinković-Lepić**, s. r.